



In'impurtanta etappa dad in lung viadi.

CARICATURA R. GIGER

## ■ COMMENTARI

### Frestg enavant, mes Jauers

DA MARTIN CABALZAR

*La Val Müstair ha prendì ina decisiun clera e cura-schusa. Tut las sis vischnancas èn s'exprimidadas cun maiori-tad sorprendenta da vuschs a favur d'ina introducziun integrala dal rumantsch grischun en scola. Il pievel ha uschia confermà cleramain la tenuta positiva da la magistraglia e dals gremis politics vers il rg. Era sche la decisiun è crudada senza euforia, ha la populaziun tuttina laschè persuader dal basegn pragmatic da concentrar meds e forzas per la promoziun dal linguatg e da promover l'avischinaziun interrumentscha. Per la derasaziun dal rg è la decisiun da la Val Müstair ina impurtanta etappa sin in viadi stentus a l'acceptanza. Per autras regiuns è la decisiun da Müstair in signal da partenza che fa curaschi. Resuns positivs datti era gia en il Grischun central, dentant er a Laax, Rueun e Tujetsch.*

*La Val Müstair cun ses dialect jauer e ses linguatg da scrittira vallader è stada predestinada da surpi-gliar ina rolla da pionier tar l'introducziun dal rg. Dapi tschientaners èn ils Jauers sfurzads d'emprender en scola l'diom vallader sco linguatg da scrittira. Il pass dal jauer al rg na dastgass betg esser blier pli difficil che quel da jauer al vallader. Malgrà la «colonisaziun» valladra e putèra da tschintgtschient onns ha il jauer mantegnì sia urdadira e genuinitad. Quai cunterdi a la tesa ch'il rg chatschia a chantun e saja il pizamort dals idioms pledads.*

*La populaziun da la Val Müstair ha fatg in emprim pass decisiv. Uss è dumandà e pretendì il chantun. Sia sfida primara èsi da procurar tant pli spert per ina buna scolaziun e perfecziun da la magistraglia e per meds d'instrucziun attractivs ch'augmentan la motivaziun d'instruir ed emprender rumantsch. Era quai è ina schanza per la scola rumantscha. Il project da pionier è condemnà al success, uschi-glio è il naufragi programmà.*